

Suatu Tuduhan yang Tidak Bertanggungjawab

Orang Melayu Lemah Kerana Fanatik Agama?

Dalam Mastika keluaran bulan Disember 1959,

Ismail bin Ali telah menulis sebuah rencana yang tertajuk, **Konsep Orang-orang Melayu Patut Diubah**. Di dalam rencana itu, sesudah menerangkan kesempitan-kesempitan kehidupan orang-orang Melayu yang tinggal di kampung-kampung dengan hal-hal hidup dan pelajaran mereka, maka ia pun menyatakan:

“Orang-orang Melayu hari ini, walaupun sudah mempunyai kesedaran tentang pelajaran anak-anak mereka, masih banyak yang belum terlepas daripada kongkongan adat-adat lama yang karut-karut. **Mereka paling fanatik dalam hal agama mereka.** Agama dijadikan matlamat pertama dalam cita-cita hidup mereka. Soal agama mesti didulukan dari perkara-perkara yang lain. Mereka rela mati kelaparan kerana agama mereka atau mereka sanggup membiarkan anak-anak mereka buta huruf untuk kepentingan agama. Pendek kata konsep yang **terlalu fanatik terhadap agama** inilah yang boleh menyebabkan orang-orang Melayu lemah atau tertinggal di dalam lapangan pelajaran tinggi.”

Ia kemudiannya menyebut cara hidup lama orang-orang Melayu dalam sosial mereka. Mereka, orang-orang Melayu di kampung-kampung dikatakannya **tidak suka kepada kelengkapan cara baharu** kerana mereka **tidak berkemampuan**. Mereka, katanya, tidak mau anak-anak mereka masuk ke universiti, kerana mereka tidak mendapat galakan. Mereka lebih suka diam di luar-luar bandar kerana ekonomi mereka tidak mengizinkannya.

Sekian perkara-perkara yang perlu mesti diperhatikan terutamanya oleh orang-orang Islam yang taat kepadanya, yang bersedia mati di dalam agamanya, yang tahan lapor dalam memperjuangkan agamanya bahkan orang-orang Islam bersedia menjual nyawanya untuk mencari keredaan Tuhan.

Masih Mentah

Sekali imbasan daripada tulisannya ini menzahirkan bahawa Ismail Ali adalah seorang yang masih mentah di dalam menulis mengenai perkara hidup di dalam masyarakat orang-orang Melayu. Tidak itu sahaja tetapi ia adalah seorang yang sangat jahil di dalam perkara agama dan undang-undang hidup beragama. Ia harus seorang yang terikut kepada gambaran orang-orang barat terhadap kepada hakikat agama Islam dengan gambarannya bahawa **orang-orang Islam itu ialah orang-orang tua yang berpakaian buruk, hidup di dalam kemiskinan dan di dalam berpakaian compang-camping** sehingga ia (Ismail Ali) sendiri terikut-ikut jijik melihatnya disebabkan kejahilannya.

Sebelum saya menunjukkan tentang kecerobohannya dalam perkara agama Islam molek dahulu saya membuktikan di dalam pengertiannya menulis di dalam Bahasa Melayu. Katanya “mereka tidak suka kepada **kelengkapan cara baharu** kerana mereka **tidak berkemampuan**”.

Cuba pembaca perhatikan: Tidakkah yang jadi sebab orang-orang kampung tidak dapat menggunakan kelengkapan baharu kerana ia tidak mampu? Ini tidak bermakna mereka tidak suka. Tiap-tiap seorang manusia hidup di mana pun ia berada, ia berhajat dan bercita-cita kepada kesenangan dan kebahagiaan hidup. Mereka mau menggunakan segala-galanya untuk menyampaikan segala kesenangannya tetapi kerana kekuatan membeli atau kerana kelemahan ekonomi maka tidaklah dapat ia menggunakan benda-benda baharu itu. Jadi nampaknya penulis ini berdusta dan tidak mengerti apa erti yang ditulisnya yang bertentangan di antara satu dengan lain.

Perkara yang saya tunjukkan di atas biarlah sebagai sedikit kursus kepadanya, semoga lain kali supaya cermat menulis – supaya tulisannya tidak bertentangan dengan keadaan yang sebenarnya. Kalau perkara ini saya hendak kupas banyak didapati di dalam tulisannya itu. Pembaca-pembaca perhatilah sendiri di dalam kata-kata yang tersebut di atas.

Menghina Islam

Dengan perkataannya yang berkata: “**Pendek kata konsep yang terlalu fanatik terhadap agama inilah yang boleh menyebabkan orang-orang Melayu lemah atau tertinggal dalam lapangan pelajaran tinggi.**”

Menurut pendapat saya bahawa perkataan seperti ini adalah suatu penghinaan kepada Islam – Islam adalah dikatakannya menjadi sebab orang-orang Melayu lemah dan tertinggal di dalam lapangan pelajaran tinggi.

Perkataan ini adalah perkataan yang sangat jahil. Ia tidak mengetahui hakikat Islam. Hal ini sangat disayangkan, seorang Islam sendiri (mengikut namanya) jahil dalam hakikat agamanya.

Bagi seorang hamba Allah yang beriman kepada Allah maka ia yakin *al-Qur’ān* itu adalah kitab daripada Allah yang disampaikannya kepada Muḥammad untuk memberi pertunjuk kepada manusia. Seseorang hamba Allah yang beriman adalah percaya dan yakin akan firman-Nya dan taat kepada-Nya. Bagi mereka adalah Islam agama yang sah di sisi Tuhan. Firmannya :

Inna al-dīn¹ ‘inda Allāh al-Islām.

Ertinya: Sesungguhnya agama (yang sah) di sisi Allah ialah Islam.

Firman-Nya lagi:

Wa man yabtaghi ghaira al-Islām dīnan fa lan yuqbala minhu.

Ertinya: Barangsiapa cari (menghendaki) agama lain daripada Islam maka tidak akan diterima (agama ini) daripadanya.

Firman-Nya:

Wa radhītu lakum al-Islāma dīnan.

Ertinya: Telah aku redakan bagi kamu Islam itu sebagai agama buat kamu.

Berasas kepada ayat-ayat ini dan banyak lagi ayat-ayat lain, maka bagi seseorang yang beriman maka tidak ada agama yang lain daripada Islam yang telah diturunkan oleh Allah kepada makhluk-Nya. Islam diturunkan Tuhan daripada Ādam dengan berdikit-dikit sehingga disempurnakan-Nya kepada penyudah Rasul-Nya Muḥammad ᷣallā Allāhu ‘alayhi wa ălihi wa sallam.

Ajaran yang dibawa oleh Islam ialah yang pertamanya untuk mengesakan Tuhan – tidak menyekutukan-Nya dengan sesuatu pun. Yang kedua menyeru kepada berbuat baik dan menegah kepada kejahatan.

Di dalam sejarah permulaan Islam, adalah sangat digalakkan tiap-tiap pemeluknya menuntut ilmu pengetahuan – disuruh belajar membaca dan menulis serta mempelajari ilmu-ilmu itu sedalam-dalamnya sama ada mengenai dunia dan akhiratnya. “Tuntutlah olehmu akan ilmu itu sekalipun di negeri China.” “Menuntut ilmu itu difardhukan atas lelaki dan perempuan.”

Demikianlah lebih kurang sabda Nabī (S.A.W).

Kita melihat di dalam zaman Islam banyak mereka-mereka yang telah jadi ahli ilmu pengetahuan yang sehingga sekarang dikenal oleh dunia Barat sebagai tempat punca mengambil pengetahuannya: Ibn Sinā sebagai tempat mereka mengambil ilmu tabib (perubatan), Al-Ghazāliyy sebagai tempat mereka mengambil ilmu undang-undang. Banyak lagi ahli-ahlinya yang ilmuwan dikutip oleh orang-orang Barat.

Dengan ini terang Islam sangat menggalakkan pemeluk-pemeluknya menuntut ilmu dan berilmu. Agama Islam **tidak membenarkan buta huruf**. Islam menghendaki pemeluknya **berpelajaran dan berilmu**. Sekiranya orang-orang Melayu mundur maka itu bukan kesalahan agama Islam tetapi kesalahan umat Melayu itu sendiri. Mereka tidak mempelajari ajaran Islam bersungguh-sungguh.

¹ yang tertulis dalam teks ialah ’Innalladhīna, dalam Quran yang betul seperti dalam pembetulan

Sebab-sebab kelemahan ekonomi orang Melayu bukannya kerana ajaran agama Islam. Agama Islam menggalakkan pemeluknya memberi, bukan menadah tangan (meminta). Orang yang menadah tangan dipandang hina oleh Islam.

Islam menggalakkan pemeluknya supaya berusaha siang dan malam mencari kekayaan di dunia. Islam melaknat kemalasan pemeluk-pemeluknya.

Kalau umat Melayu lemah dan tidak kuat berusaha maka dengan sendirinya mereka tidak mengikut ajaran agama Islam.

Apabila seseorang Islam telah mempunyai kekuatan, kesenangan dan kebolehan maka diwajibkannya supaya berjihad kepada jalan Allah. Ia diwajibkan menolong saudara-saudaranya terutamanya jiran-jirannya. Ia disuruh bekerja untuk menyampaikan seruan Tuhan supaya tiap-tiap seorang seorang berbuat baik dan menegah kemungkaran.

Bagi seorang Islam **memang Islam mendahulukan agamanya daripada yang lain-lain**. Orang-orang Islam yang beriman memang fanatik kepada agamanya. Ia hidup mencari keredaan Tuhan!

Bagi seorang Islam yang beriman, kalau diseru kepada jalan Tuhan, maka dengan tidak segan ia terus akan tampil ke hadapan mengorbankan segala-galanya kepada jalan Allah. Untuk ini bukannya sahaja hartanya yang akan dikorbankannya tetapi kalau nyawanya diberikannya untuk menegakkan kalimah Tuhan. Dalam sejarah perkembangan Islam, dapat kita lihat bagaimana pahlawan-pahlawan Islam di dalam perjuangannya, mereka mencari mati di jalan Allah (bukan mencari pangkat). Kepada mereka mati membela dan menegakkan kalimah Tuhan adalah semulia-mulia kematian dan dicari mereka. Mereka tidak sahaja rela kelaparan di dalam membela agama Allah tetapi mereka tahan diseksa dan menderita di dalam menegakkan kalimah Tuhan.

Dengan tegas saya berani mengatakan bahawa jika tidak ada umat Islam yang fanatik kepada agamanya, **yang mendahulukan**

agama daripada yang lain-lain, maka Islam tidak akan terdiri dan tidak akan berkembang hingga sekarang. Kalau tidak ada orang-orang yang berani berjihad dengan harta dan dirinya (kalau perlu nyawanya) kepada jalan Allah sejak daripada mula disempurnakan oleh Junjungan Nabī Muḥammad *sallā Allāhu ‘alayhi wa ālihi wa sallam* maka Islam tidak akan sampai ke Tanah Melayu ini!

Tetapi **pendusta sungguh** orang yang mengatakan bahawa **Islam membiarkan anak-anak mereka buta huruf untuk kepentingan agama**. Islam menghendaki tiap-tiap pemeluknya supaya berilmu. Saya tidak akan mengatakan di sini satu persatu alasannya buat penulis yang jahil terhadap kepada keadaan agama Islam. Islam menghendaki pemeluknya berjiwa hidup, berjiwa berkorban kepada Islam. Tidak ada gunanya pelajaran tinggi menjulang langit kalau dengan ilmunya itu ia menjadi orang kafir atau murtad. **Orang yang menjadi musuh Tuhan!**

Islam menganjurkan orang-orang berilmu tetapi dengan ilmu itu ia tidak membelaikan Islam – ia menghendaki tiap-tiap pemeluknya fanatik untuk berkorban kepada jalan Allah.

Kita jangan mencela pelajaran pondok umpamanya. Pelajaran itu diakui terkebelakang tetapi dengan orang-orang daripada pondok itulah mulanya terdiri pejuang-pejuang di tanah air kita ini merebut kemerdekaannya. Di Tanah Melayu, tidak terkecuali di Indonesia, pejuang-pejuang kemerdekaan di tanah air adalah ditaja oleh pejuang-pejuang Islam terutamanya daripada orang yang belajar di pondok-pondok itu.

Sungguhpun mereka di dalam kekurangan tetapi mereka dahulu mengeluarkan seorang dua pejuang-pejuang yang sentiasa memberi pengorbanan dan berjihad, kerana jiwanya penuh dengan perasaan berkorban kerana agamanya. Kita dapat memberi perbandingan sekarang, dengan ajaran secara moden, walau pun dengan adanya Kolej Islam, kita hampir-hampir tidak mendapat pejuang-pejuang yang tulus ikhlas memperjuangkan agama

dan bangsa seperti orang-orang keluaran di pondok-pondok yang kekurangan di dalam serba-serbinya dahulu.

Tidakkah saudara Ismail Ali melihat bahawa Indonesia tidak akan dapat kemerdekaannya jika tidak kerana perjuangan di antara kafir dan Islam? Tidakkah saudara tersebut mendengar bahawa dengan gema takbir yang fanatik agama seperti saudara sebut mereka berjuang habis-habisan dengan darahnya, dengan keberanian luar biasa berjuang menegakkan negaranya? Tidakkah dengan gema takbir mereka bangkit? Tidakkah dengan kerana fanatik agama di mana-mana tempat umat Islam bangun melawan musuh-musuhnya, penjajah-penjajah di tanah airnya?

Dapatkah saudara menafikan bahawa dengan kerana pejuang-pejuang Islam yang fanatik kepada agamanya maka timbulnya semangat perjuangan siasah di Tanah Melayu ini? Dapatkan saudara Ismail Ali menafikan jasa Almarhum Syeikh Tahir Jalaluddin, al-Sayyid Syeikh al-Hadi yang fanatik kepada agamanya itu orang-orang yang berjuang membangkitkan umat supaya sedar kepada bahaya penjajahan? Tahukah saudara bahawa Almarhum Abdul Rahim Kajai orang yang fanatik agama? Tahukah saudara siapa anak Melayu, penyambil dan penatap fanatik agama, yang menghidupkan persoalan Kapten Hashim dijadikan soal kebangsaan?

Perhatilah bahawa semangat perjuangan di tanah air kita ini adalah dipelopori oleh orang-orang yang fanatik kepada agamanya kalau tidak harus keadaan kita belum seperti hari ini.

Tahukah saudara bahawa pada masa itu orang-orang yang berpelajaran Barat yang saudara-saudara puja-puja banyak menjadi penghalang dan perintang? Tahukah saudara bahawa pada masa mula perjuangan itu banyak orang-orang yang terpelajar dengan ajaran Barat jadi tali barut penjajah?

Semuanya adalah tercatit di dalam sejarah. Ini semua sebenarnya tidak perlu buat saya mengeluarkannya tetapi apa boleh buat kerana rupanya golongan-golongan muda yang masih mentah lagi selalu tidak mau menghargakan



Masjid Sultan Abu Bakar Johor, salah sebuah masjid

yang masyhur di Tanah Melayu.

jasa orang yang telah lalu. Mereka selalu mencabar dengan tidak menyiasat. Kalau bangsa-bangsa lain di dalam dunia menghargakan usaha-usaha pejuangnya tetapi di dalam sifat bangsa Melayu nampaknya, sebahagiannya melupakan jasa-jasa pejuang-pejuang tanah airnya – tidak ada penghargaan kepada mereka. Mereka hanya menghargakan kepada “pemimpin-pemimpin” yang nampak di hadapan matanya yang telah menerima “pisang berkobak”, menerima hasil yang bersih daripada jasa pejuang-pejuang tanah air yang telah dilupakan, yang telah tidak diingat lagi. Padahal mereka pengasas dan penaja di dalam memperjuangkan perjuangan membersihkan tanah airnya daripada penjajahan.

Ketahuilah! Bahawa sifat pejuang-pejuang Islam ini bukannya mencari nama dan kemegahan serta kedudukan. Mereka berjuang kerana fanatiknya kepada agamanya dan memandang sebagai suatu kewajipan untuk memperjuangkan cita-citanya mencari keredaan Tuhan – lain tidak! Insaflah pemuda-pemuda – janganlah mencela orang tetapi bekerjalah dan tunjukkanlah tenaga untuk bekerja, ini lebih baik daripada berkata-kata kepada barang yang tidak diketahui. Jangan cuba mengukur laut dengan tali hanya sehengkal –